



油菜花開滿田

戴莊下，毋識出空，無見識，會分人笑山戇、田莊戇，正經接觸著這下个「都市戇」，正知，做山戇、田莊戇正係福氣，正正正係上天个子民。上天愛分個人个智慧，毋使教，厥等自然知得。上天个慈悲，斯隱身在該金金个目神肚，因在該深深个皺痕項。烏黔黔个膚身，耐得風吹日炙，砸礮个身胚，係上天个回饋。

阿宗原旦係莊下搭泥團大漢个細人，做兵了斯直直戴都市到今。正月初，接著老弟嫂電話，講有人中意厥等老屋該埕地，愛買來做民宿，喊佢轉莊下一掖好參詳。趁寮日，兩公姐帶核還毋知人我个兩個孫，煞煞轉老屋。

落車，無看著老弟兩公姐，鄰舍俚來親暱暱講，老弟兩公姐打早斯落田坵做事咧。順核該凘流流个年歲，該識拈蛇打蚓過个田脣路，尋一路去，無變个係這圳溝路、溝水聲，改變个係，但既經毋係往年該拌蚓捉蛇搞个細亞咧！歲月像溝水，嘩啦嘩啦，一下斯走都無魂無影哩啲！跔在厥尸背尾个兩姊妹，歸路這摸一下、該揆一下，暢都嘿嘿滾緊咻。金黃金黃个油菜花開滿田坵，在天地个懷中，佢大大方方同冬日燒暖个日頭相侵，侵出歸片个亮，滿田坵个光。兩姊妹飄落田坵肚走相逐，輪(lienˋ)出像蛇哥趕過个彎幹路，電線頂高个瓦雀比比(beˋ beˋ)企，兩姊妹看去眼呆呆。

「先生講厥等像音符，佢看一脣都毋像，音符有高有低，厥等像排列，阿姊妹講係無？」
「像啊，有兜飛上飛落，斯係音符个高低啊！」聽佢兩姊妹在會，阿宗正認真欣賞這發夢都毋會忘記个所在。細漢時節欣羨都市个鬧熱，日日盼望遽遽大漢，好去城市搵派頭，哪識幹頭看下這孫女嘴項講个一幅畫！

兩儕搞瘡咧，斯相賽拗花。「阿爹，這軟軟个東西係麼个？」「哦！該係菜蟲，係蝶个嬰兒啦！」一尾青青个菜蟲，毋堪得厥手尾力，嘔出厥青青个肉、屎，伸著扁扁个屍身在孫个手巴掌項。「死撇咧，失禮啦！」冤枉哦！毋赴結包生翼，生命斯分孫收撇咧！兩姊妹搞去歸身汗，兩隻手扞歸捧个油菜花，紅芽紅芽个面頰卵，在日頭下，同歸片个花共樣閃核光。玄玄風佢嘎呆撇，快樂个童年，在這位，佢乜識經過，厥个根在這！恁泥一轉想，心肝肚嘎定疊落來咧。

闊闊个田坵，金黃金黃个油菜花該頭，遠遠佢影著跔核做事个老弟兩公姐，在這幅莊下个圖肚，佢兩儕係配角乜係主角。

作者：劉玉蕉

☆詞彙學習☆

【出空】chudˋ kungˋ：出遠門、長知識。

【嘿嘿滾】heˋ heˋ gunˋ：形容高聲叫喊。

【山戇】sanˋ ngongˋ：土包子。沒見過世面的人。

【輪】lienˋ：以腳踩踏蹂躪。

【正正正】zhangˋ zhinˋ zhinˋ：才真的。

【搵派頭】giugˋ paiˋ teuˋ：耍威風。

【烏黔黔】vuˋ kinˋ kinˋ：皮膚黝黑的樣子。

【手尾力】shiuˋ muiˋ lidˋ：手指的力氣。

【搭泥團】kagˋ neˋ tonˋ：玩泥巴。

【結包生翼】giedˋ bauˋ sangˋ rhidˋ：結繭之後化成蛾。

【一掖】rhidˋ rheˋ：一回。

【扞歸捧】ledˋ guiˋ bungˋ：抱滿懷。